


LUTWADUSU

 Kieleka beno ke na yawu. Kana ya kele mbote mingi samu na beno nionso, ya kele mbote mingi samu na beto, mpe.

² [Mpangi mosi ya bakala me tuba, “Ntangu yayi ba ke pesa kado ya bawu awa samu na nge.”—Mu.] Oh, la la, ya kele kitoko. Matondo na beno. [Mpangi mosi ya kento me tuba, “Kaka mwa dikabu ya fioti, Mpangi Branham, bana me bumba ba-centime ya bawu mpe bisengo. Mpe. . . ? . . .”] Matondo na nge. Matondo na nge, mpangi ya munu ya bakala. Matondo na beno, bana. Kieleka mu ke tonda beno, mingi, mingi. Mpe Nzambi sakumuna beno.

³ Beno zaba, Yesu tubaka, “Na mutindu nyonso yina beno ke pesa na bayayi ya fyoti, beno me sala yawu na Munu.” Beno me mona? Beno kele babakala mpe bakento ya mbasi, kana ya kele na mbasi, beno ke vwanda kuna, Nzambi ke na kutalaka na beno.

⁴ Matondo mingi, cherie. Mu lendaka zibula yawu? Beno kele na yawu kitoko mingi, ya kele mpasi mingi na . . . oh la la, ya kele kitoko. Nkooko ya bakala fwana kuzwa maneti ya yandi, beno zaba: “Lukwikilu na . . . mbuma ya nkuna ya mutarde . . . Nsangu ya beno . . .”

Ya kele mbote ve? Beno me mona? Oh, la la, la! Mu ke yinaka beno na kupesa munu yayi. “Mpangi ya luzolo Branham, Oh, nge kele nkundi mosi ya mbote. Beto ke tula kivuvu ti nge ke—nge ke vwanda ya kusakumuna na bima nyonso yina nge me mona. Beto zola nge; na kyese nyonso yina; mpe lendaka, Mfumu ya luzolo Yesu sakumuna nge.”

Oh, ya kele kieleka kitoko. Matondo na nge, cherie, mosi na mosi ya beno. Ya kele kieleka mbote.

[Mpangi mosi ya bakala me tuba, “Mpangi Branham, mu banza ti nge ke ndima ti beto kele na mulongisi ya mbote ya Lukolo ya Lumingo.”—Mu.]

Kieleka beno me kuzwa. (Beni simba kaka yayi samu na munu, Billy.) Ntangu yayi, yayi kele kieleka, ya kusala mbote mingi, mu ke yinaka kukondwa yawu. Kitoko mingi. Mu me teka mosi ya mama me sala yayi. Ya kieleka? [Mpangi Branham me zibula dikabu yankaka—Mu.] Huh? Mbote, mu fwana . . . Ya ke dumuka ve? Oh, la la. Oh, Oh, la la. Ya kele kieleka mbote. . . ? . . . beto ke kwenda na yawu. Leo, ke kukiyufula wapi dibuta yandi kele. Yandi ke pusa yawu na konso foto. Ya kele kieleka mbote.

Ntangu yayi, bana, yina kele dimpoka ya bantu mingi mpe mu ke baka yayi mpe ke tula yawu na kati ya yinzo ya beto ya malu-malu. Mpe mu fwana banza ntangu nyonso yina—mutindu beto kele na yinzo beto ke kuzwa yayi na mabanza ya mwa lukolo ya Lumingo yayi awa na Prescott. Mu ke vutula

matondo na Nzambi, mu ke vutula matondo na Mfumu samu na nyonso; mpe mu ke vutula matondo na Nzambi samu na bana-babakala ya fioti ya mbote mpe bana-bakento mutindu beno nionso kele. Beno banza kaka na munu na ntangu yayi—yayi. Nzambi sakumuna beno nionso. Matondo mingi, yinga, ya kele kieleka mbote. Ntwadusulu ya kimpeve, ya kele kaka yina beto vwandaka zola, kima mutindu yina. Beto ve?

[Mpangi-bakala mosi ke tuba—Mu.] Mbote.

[Mpangi mosi ya bakala me tuba ti ba kubikaka nkunga na muniti ya nsuka.] Ya kele ntangu yina ya ke vwanda mbote mingi.

[Nkonga ya bampangi-bakento ke yimba *Kuna Na Nkembo ya Yandi*.]

O mutindu mu zola Yandi! Mutindu mu ke kembila Yandi!

Kupema ya munu, nsemo ya munu nyonso, nyonso ya munu!

Mvangi ya nene kumaka Mvulusi ya munu, Mpe muvimba ya Nzambi ke zingaka na kati ya Yandi.

[Bampangi-bakento ke landila na kuyimba *Kuna Na Nkembo ya Yandi*. Mpangi-bakala mosi ke twadisa *Kwikila Kaka*—Mu.]

. . . kwikila kaka,
Nionso ke salama, kwikila kaka;
Kwikila kaka, kwikila kaka,
Nionso ke salama, kwikila kaka.

Mu banza ti mu lendaka longa bangunga yiya ntangu yayi, na manima ya nionso yina. Mu vwandaka banda na kubanza ti mu me lemba. Kuyituka ve ti beno bana-bakento ya fioti lendaka yimbila mbote, beno bana-bakento ya fioti mpe bana-babakala ya fioti; beno kuwa mutindu bampangi ya beno ya bakento ya bakuluntu ke yimbaka, mpe bamama ya beno, miyimbidi ya mbote mingi. Ya kele kieleka kitoko. Nani kele mwana-kento yayi ya fioti yina twadisaka nkunga yina, nge kele ve mwana-kento yina mu kutanaka kuna? Kieleka beno kele na ndinga mosi ya kitoko; beno nionso. Beno kaka . . . Mu ke kwikila ti ya vwandaka, bankunga ya kulutila kitoko yina mu me kuwaka ntete ve, kele awa. Beno nionso ke sala yawu ntangu nionso? [Mpangi-bakala mosi me tuba, “Ve. Ya ke mutindu yina beto ke yimbaka.”—Mu.] Mbote, mu ke tuba na beno, kieleka beno—beno kele ya kusakumuna na bankunga mosi ya mbote.

⁵ Mu ke zolaka bankunga ya mbote. Mu ke zolaka kaka kuyimba ya mbote. Mu ke tubaka ntangu nyonso, ntangu mu ke kuma na Mazulu mu zola kuma kisika bawu ke na kuyimba, mpe kuwa. Mu me fulukaka ntete ve na kuyimba.

⁶ Beno zaba, kuyimba ke pesaka kikesa. Beno zaba yawu, mutindu yina ve? Basoda, na ntangu bawu ke kwendaka na

bitumba, beno zaba yina bawu ke salaka? Ba ke bula musiki mpe ke yimba, mpe bima samu na kupesa bawu kikesa. Mpe ntangu beto ke kwenda na bitumba, beto ke yimbila, mpe—mpe ya ke pesa beto kikesa na kukwenda na ntuala.

⁷ Mu ke tonda beno bana ya fyoti samu na dikabu yayi ya mbote. Mpe ya kele. . . Mama Branham, mpe katuka Rebecca, mpe Joseph, mpe Sarah, mpe beto nionso, beto ke tonda nge mingi. Ya kele mpasi na kutuba, mutindu ya kutuba na bawu bana ya fyoti, “Ve. Beno me bumba ba-centime ya beno. Mu—mu zola ve kubaka yawu.” Beno zaba mutindu mu ke kuwaka, mu zola ve kubaka yawu. Kasi dyaka mu talaka awa mpe bawu vwandaka na billet ya dollar kumi na kalati yayi. Mu banzaka, “Mu lenda baka yawu?” Mu banzaka, “Wapi mutindu mu lenda sala yawu?”

⁸ Kasi mu ke bambuka moyo na mwa disolo yina mu zola ti beno zaba. Kilumbu mosi ya vwandaka na mufwidi mosi ya kento, yandi vwandaka na nkonga ya bana, mu banza yandi. . . mwa papa ya bana yina kwendaka. Mpe yandi vwandaka kaka na ba-centime zole. Mpe yandi kulumukaka bala-bala, kilumbu mosi. . . Mpe ya vwandaka mbongo ya mosi ya kumi, kaka ba-centime mutindu beno nionso me bumbaka, mpe yandi losaka yawu na kati ya kimvwama ya Nzambi. Yesu vwandaka ya kutelama kuna, vwandaka tala yandi mbote. Mpe mu vwandaka kukiyufula, “Yinki mu zolaka sala kana mu vwandaka ya kutelama kuna?” Mu lendaka kwenda mbangu mpe kutuba, “Ve, ve, mpangi-kento, kusala yawu ve. Beto—beto ve, kieleka beto ke na nsatu ya yawu ve. Beno ke na nsatu ya yawu samu na bana yina.” Beno me mona? Ntangu yayi, mu zolaka bika yandi ve kusala yawu. Kasi Yesu bikaka yandi kusala yawu. Beno me mona, Yandi bikaka yandi kusala yawu. Samu na yinki? Yandi zaba ti ya kele mingi ya kusakumuna na kupesa na yina ya kele kuzwa. Yandi zabaka yina Yandi ke sala samu na yandi, beno me mona.

Na yawu mu ke tonda beno bana ya fyoti, na ntima ya munu nyonso.

⁹ Mu zola kutonda mosi na mosi ya beno, samu na ntangu yayi ya mbote ya kimpangi, Mpangi Leo mpe Gene. Yayi vwandaka kieleka bilumbu tatu ya kusambila, samu na munu. Mpe kuna na mfinda, ntangu mu ke meka na kukwenda mpe kubanza ti mu vwandaka zomba, Na mutindu mosi to yankaka, mu ke tala beno mpe mu ke kuwa beno kuzonza. Mu kuzwaka bweso na manima ya midi yayi na kutala bayinzo ya beno. Mu me monaka ata fioti ve, mu me kotaka na kati ya mingi, mu ke bokila yawu bwala, ti mu me monaka ntete ve, bayinzo mpe bantu ya kulutula bunkente mpe ya kulengula, mpe buzitu mingi samu na Klisto mpe Nsangu ya mbote. Mu—mu me monaka yawu ata fioti ve kisika mosi. Mpe kieleka beno me banda na nzila ya mbote, beno landila kaka na kukwenda mpe Nzambi ke vwanda na beno. Mpe mu fwana

mona bayankaka ya beno. Mu monaka, kilumbu yankaka yina, bampangi ya bakento yayi, mu zabaka bawu ve, samu nionso yina mu lendaka mona ke vwanda kaka na meso ya bawu mpe mbombo ya bawu, kuna na nsi ya mosi ya ba-capuchon yayi. Mpe ntangu yayi mu ke kwikila ti mu zaba nge mbote, na nzila ya lutondo ya Mpangi Leo mpe Gene, yina nataka munu mpe salaka ti mu tala bayinzo ya beno; mpe na kupesa mbote na bana ya fioti, baprofete mpe baprofete ya kento ya nsungi ke kwiza, kana ya kele na nsungi ke kwiza.

¹⁰ Beno zaba, Yesu ke zolaka bana ya fyoti. Beno zaba, Yandi ke salaka yawu. Mpe ya vwandaka na mwana-bakala ya fioti, kilumbu mosi, na nkumbu ya Moise, beto ke tubila yandi na mwa ntangu fioti. Mpe yandi vwandaka kieleka mbote. . . Beno zaba yina salaka yandi, sadisaka na kusala yandi mwana-bakala ya mbote? Yandi vwandaka na mama ya mbote samu na kusansa yandi. Beno me mona, yawu yina. Yandi longaka yandi samu na Mfumu. Mpe beno bana-babakala ya fioti mpe bana-bakento kele na mutindu mosi ya bamama samu na kusansa beno, kulonga beno na yina me tala Mfumu. Beno banza kaka na bawu.

¹¹ Beno zaba yinki, beno zaba yina Musiku ya ntete kele na kati ya Biblia, Musiku ya ntete na nsilulu, na nsilulu? Beno lenda vwanda mwa mpasi samu na beno na kubakula Misiku yayi. Musiku ya ntete, kele, “Kuvwanda ve na nzambi yankaka kasi Yandi.” Kasi Musiku ya nene. . . Mpe Musiku ya ntete yina kele na nsilulu samu na yawu, beno me mona, kele samu na bana. Beno zaba yawu? Hmm? Yandi tubaka, “Bana, tumama na bibuti ya beno, yina lendaka kumisa yinda bilumbu na zulu ya ntoto, ti Mfumu Nzambi ya nge me pesa nge.” Samu na kuwa bibuti ya beno mpe kusala yina beno ke na kusalaka, ya lendaka pesa beno luzingu ya yinda na zulu ya ntoto, ti Mfumu me pesa beno, ntangu mingi samu na kusadila Yandi.

¹² Mu banza, bubu yayi, ti mu ke na kutalaka nkonga ya milongi mpe miyimbi mpe ba-evangeliste ya kilumbu yina ke kwisa, kana ya kele na kilumbu mosi na manima ya beto.

¹³ Mpe ya kele kaka na kima mosi awa, beno—beno ke kufwa muntu na lutondo. Mu ke kudya tii mu lendaka ve kudya, mpe mu—mpe ba me yambaka munu ata mbala mosi kulutila. Kana mu vwandaka Wanzio, yina kubwaka na Mazulu, ba lendaka ve kuyamba munu kulutila mbote. Kima kaka mu lenda tuba na beno, kele, “Matondo na beno.” Mpe ntangu beno ke vwanda kuna na Tucson, mu lendaka vwanda ve na lenda ya kusala beno mbote yina, samu ti mu zaba ve mutindu; Mu kele ve na mutindu ya kusala yawu, kasi mu ke sala nyonso mu lenda sala. Beno kwiza.

¹⁴ Mpangi-bakala mpe Mpangi-kento Shantz, kieleka mu zola kutonda bawu. Mpe mu kuzwaka bweso ya kukutana na mwana ya nge ya kitoko, ya ntwenya ya kento, mpe mwana ya bakala,

na manima ya midi yayi. Mpe—mpe samu na kubika beto kuzwa yinzo ya yandi awa kuzibuka samu na kusambila. Ya vwandaka na bima ya mutindu yina yina vwandaka salama na kilumbu ya Biblia, beno zaba, ti Nsangu ya mbote vwandaka. . . Mu zaba ti ya ke wakana kieleka fyoti. Beto, beto ke banza ti ya kele ve mutindu yina. Kasi yayi kele kaka mutindu Nzambi. . . na Nzambi, mutindu bawu vwandaka na kilumbu yina.

¹⁵ Beno bambuka moyo, kana ya ke vwanda na bamvula mingi yankaka, ba ke tala na manima awa mpe ke tuba, “Kana mu zingaka kaka na bilumbu yina kuna na Prescott! Kana mu zolaka zinga kaka. . .” Beno me mona? Ntangu yayi beto ke na kuzinga na kilumbu yina. Beno me mona? Na yina beto ke kuma na nsuka ya nzila, na yina beto ke vingila musendo ya beto na Kilumbu ya nene.

¹⁶ Ntangu yayi beto ke zibula Ndinga ya Nzambi mpe ke tanga. Kasi kaka ntete beto sala, beto zonga na Yandi kaka mwa ntangu fyoti.

¹⁷ Yesu ya luzolo, mu lenda ve kutuba bansatu ya munu—ya munu mpe kuvutula matondo ya munu na Mpangi Mercier, Mpangi Goad, mpe bantu yayi nionso ya mbote mpe bana ya bawu ya fioti, wapi mutindu ba me talisa beto kubanda beto kele awa. Bumbote kele na zulu ya nyonso yina beto vwandaka vingila. Mpe beto zaba ti bawu vwandaka kitoko mpe na lembami. Kasi beto zabaka ve ti ba ke yamba beto na mutindu ya kieleka ya kimfumu. Mpe, Mfumu, mu ke sambila ti Mvwandulu ya Nge ke vwanda ntangu nionso na camp ya bantu yayi, Mpeve-Santu ke fulusa konso ntima awa, mpe Nge ke pesa bawu Luzingu ya Kukonda nsuka. Mpe ti beto, mutindu beto ke sepela bubu yayi, ti ya vwanda na Kilumbu ya kukondwa nsuka ti ntangu beto ke kutana na Mvwandulu ya Yandi Yina beto ke sambila mpe ke zolana, mpe ke pesa lukumu na bima yayi nionso. Tii na ntangu yina, Mfumu, bumba beto ya kukwikama na Yandi mpe na Ndinga ya Yandi. Na Nkumbu ya Yesu beto ke sambila. Amen.

¹⁸ Ntangu yayi, mu me baka beno ntangu ya yinda na suka yayi, mu ke meka mpe mu ke sala yawu na nswalu nionso na manima ya midi yayi, mpe kutuba na mutindu ti mu banza na bana ya fioti, mpe bambuta ke bakula, mpe.

¹⁹ Mu zola kutanga Masonuku awa, yina kele na Buku ya Santu Marc, mpe mu zola kutanga na nzila ya 17 ya kapu 10 ya Santu Marc, kitini.

Mpe ntangu yandi kwendaka kuna na nzila, ya vwandaka na mosi kwisaka na mbangu, mpe na kufukamaka mpe na kuyufulaka yandi, na kutubaka, Mulongisi ya mbote, yinki mu ke sala ti mu kuzwa luzingu ya kukonda nsuka?

Mpe Yesu tubaka na yandi, Samu na yinki nge ke bokila munu muntu ya mbote? ya kele ve na muntu ya mbote kasi mosi, mpe ya kele, Nzambi.

Nge zaba misiku, Kusala pité ve, Kufwa muntu ve, Kuyiba ve, Kupesa ve kimbangi ya luvunu, Kuvuna ve, Zitisa tata ya nge mpe mama ya nge.

Mpe yandi vutulaka mpe tubaka na yandi, Mulongisi, nyonso yayi mu me salaka, tutumamaka, zitisaka (mu zola tuba) katuka buntwenya ya munu.

Na yina Yesu talaka yandi mpe zolaka yandi, ntwenya ya bakala yayi; mpe yandi tubaka na yandi, Kima mosi nge ke kondwa: kwenda, teka nyonso yina kele ya nge, mpe pesa na bamputu, mpe nge ke kuzwa bimvwama na mazulu: mpe kwisa, baka kulunsi ya nge, mpe landa munu.

Mpe yandi kumaka na mawa na nzonzolo yayi, mpe kwendaka na kyadi: samu yandi vwandaka na bimvwama ya nene.

²⁰ Ntangu yayi na bana, mpe na bakuluntu mpe nyonso, Mu ke zola ti mwa Nsangu yayi ya fioti kuvwanda na ntangu ya mbote mutindu mu lendaka, na nswalu mutindu mu lendaka. Mpe mu zola baka mutindu masonuku, “landa Munu,” mpe mu zola kubaka dilongi: *Lutwadusu*. Beno landa, mpe muntu mosi samu na kutwadisa; *Lutwadusu*, mpe “kulanda Munu.” Bantwenia, bantu, . . .

²¹ Beno bambuka moyo na yawu, kitambi ya ntete yina beto tambulaka, muntu mosi twadisaka beto. Beno bamama beno bambuka moyo na bitambi ya ntete yina junior mpe mwana-kento yina tambulaka, mpe ba ke bambuka moyo na yawu diaka ve. Kasi muntu mosi twadisaka nge na kitambi ya nge ya ntete. Mu ke bambuka moyo na Billy Paul ntangu yandi salaka kitambi ya yandi ya ntete, Joseph mpe bawu nionso, na ntangu bawu salaka kitambi ya bawu ya ntete.

²² Ya ke vwandaka ntangu nionso mama yina ke twadisaka mwana na kutambula ya yandi ya ntete, samu ti yandi kele na yinzo na ntangu yina papa me kwenda na kisalu, ke na kumeka na kuzwa luzingu. Kasi, ya kele, bawu ke sala dikulu ya bawu ya ntete. Mpe na mpimpa ntangu bawu ke kota, tata, yandi ke tubaka ntangu nyonso. “Oh, papa,” yandi tubaka, “Johnny mpe Marie,” mwana-bakala ya fioti to mwana-kento, “lenda tambula! Kwisa mpe tala!” Mpe kaka kitambi mosi, mu banza ti mama zolaka kusimba; zolaka kusimba musapi ya mama, mpamba ve ti beno vwandaka fyoti ya kulemba, mpe mutindu ya kubaluka na lweka yankaka, beno zaba, mpe kubwa mwa fyoti. Na yawu beno fwana simba diboko ya mama, samu na kusala kitambi ya beno ya ntete.

23 Ntangu yayi, muntu mosi sadisaka beno, ntangu beno salaka kitambi ya beno ya ntete. Mpe kitambi ya nge—ya nge ya nsuka yina nge ke sala na luzingu, muntu mosi ke twadisa nge. Beno me mona, ya kele kieleka. Mu zola beno kubambuka moyo na yawu. Kitambi ya beno ya ntete, muntu mosi twadisaka beno. Mpe kitambi ya beno ya nsuka, muntu mosi ke twadisa beno.

24 Beto fwana twadisama. Beno zaba, Nzambi ke fwanikisa beto na mameme. Mpe beno zaba ti dimeme lenda ve kutwadisa yawu mosi? Yandi ke kwenda ntama mpe ke zimbana, mpe yandi—yandi lenda kaka ve kutwadisa yandi mosi. Mpe yandi fwana kuzwa muntu samu na kutwadisa yandi. Mpe ntangu yankaka. . . Muvungi fwana kutwadisa dimeme. Ntangu yayi yina vwandaka kuna na bilumbu ya Mfumu Yesu, Yandi vwandaka Muvungi ya mbote yina twadisaka dimeme.

25 Kasi bubu yayi, beno me mona, beto ke na kuzinga na kilumbu yankaka, bima nionso me soba mpe me beba. Beno zaba yina muntu fwana twadisa mameme bubu yayi? Nkombo. Mpe beno zaba kisika nkombo yina ke twadisaka bawu? Kaka na kati ya abattoir. Mwa mameme yayi zaba ve kisika bawu ke na kukwendaka, na yina nkombo ke mata na zulu ya lupangu mosi, na zulu ya abattoir, mpe dimeme zaba kima yankaka ve kasi kulanda ntwadisi, na yina ya ke twadisa bawu mbala mosi na kati ya abattoir yayi. Mpe kuna nkombo ke dumuka na lweka, mpe dimeme ke kota mpe ke kufwa. Beno me mona, nkombo, ntwadisi ya yimbi.

26 Kasi Yesu, Muvungi ya mbote Yina twadisaka dimeme, Yandi twadisaka bawu na Luzingu mpe simbaka bawu. Beno me mona, kasi muntu mosi fwana twadisa dimeme.

27 Ya ntete kele bumbote ya mama, na yina ndinga ya tata. Na manima mama me pesa beno kitambi ya ntete, kuna beno ke tala papa ya beno, beto nionso, samu na ndwenga, samu yandi kele yintu ya yinzo. Mpe yandi ntangu nyonso. . . Ve ti yandi kele ya kulutula mayela, kasi yandi—yandi me sala kaka ntwadisi ya dibuta ya yandi, na yawu beto ke landa yina papa ya beto ke tuba na kusala. Ntangu yandi tubaka, “Ntangu yayi, mwana, mu ke zola ti nge sala kima *yayi-yayi*,” *na yina* beto ke kuwa yandi samu ti ya kele ndwenga. Kasi beno kuwa, beno me mona, yandi me longuka mingi mpe beto fwana yufula yandi, samu na kumona yina yandi longokaka, mpe na yina beto lenda kuzwa ndandu na nzila ya yandi, yina yandi me longukaka. Yandi ke tuba na beto, “Ntangu yayi kukwenda ve mpe sala *yayi*, samu ti mu salaka yawu. Tata ya munu tubaka na munu na kusala yawu ve, kasi mu salaka yawu, mpe ya salaka ti *yayi* kusalama na munu, kima mosi ya yimbi.” Na yawu, beno me mona, beto ke. . . Na yina yandi, papa, tubaka na beto wapi mutindu ya kusala, mpe yinki ya kusala mbote.

28 Na yina na manima mama ke twadisa beto, tii ntangu

beto fwana kuzwa mwa ndwenga, samu na kubakula, na papa, na manima beto ke kuzwa yankaka. Beto ke kuzwa ntwadisi yankaka, mpe ya kele mulongisi, mulongisi ya mbote ya lukolo. Yandi ke meka na kulonga beno mpe ke pesa beno ndongosolo, samu na beno sikama mbote na luzingu, samu na kisika mosi, kisika yina beno lenda—beno lenda tanga Biblia ya beno mpe beno lenda tanga minkunga, mpe beno lenda longuka Nzambi mpe kutanga, beno mosi, beno me mona. Mpe na yina, kima yankaka, mu banza ti beno ke kuzwa mumbongo, mpe muntu mosi ke sonika na beno mukanda, mama, papa, muntu mosi ke sonika na beno mukanda, beno lendaka ve kutanga yawu. Beno me mona? Na yawu mulongisi, yandi kele na beno kuna, mpe yandi ke twadisa beno na—na—na kulongoka na kusonika mpe kutanga. Mpe ya kele kima ya mbote, mulongisi ya mbote, na kulonga beno mbote. Kasi ntangu yayi na manima beno me bika yawu, beno, na manima beno me bika mulongisi, mulongisi mosi na manima ya yankaka, katuka na mwa lukolo ya ntete, mwa mvula ya ntete, tii kuna beno ke basika na lukolo ya nene to beno ke kwenda na université. Na yina ntangu beno ke katuka na université, mpe na manima mulongisi ke manisa na kutwadisa beno. Beno me mona?

²⁹ Ntangu yayi, mama me longa beno na kutambula, beno me mona. Papa me longa beno wapi mutindu kuvwanda bakala ya ntwenya ya mayele mpe ya mbote, mpe wapi mutindu kukikeba mpe kuzinga na mutindu ya mbote. Mulongi me longa beno ndongosolo, mutindu ya kutanga mpe kusonika. Kasi ntangu yayi beno me bika tata, beno me bika mama, mpe beno me bika mulongisi, ntangu yayi muntu mosi fwana nata beno awa. Ntangu yayi nani nge zola baka nge awa? [Mwana mosi me tuba, “Yesu.”—Mu.] Ya kieleka. Yesu, samu na kunata beno kuna. Ntangu yayi, yina kele mvutu ya mbote mingi, ya mbote mingi. Yesu ke nata beno kuna.

³⁰ Ntangu yayi beno me mona ntwenya ya bakala yayi yina beto ke na kuzonzila, ba me bokila yandi mfumu ya ntwenya ya mvwama. Ntangu yayi, muntu yayi, yandi vwandaka me twadisa mbote mingi. Ntangu yayi, mama ya yandi longaka yandi na kutambula. Mpe, beno me mona, yandi vwandaka ntete ntwenya ya bakala, mu banza kaka na lukolo ya bambuta, mpe ntwenya mosi ya bakala ya kuzabana mingi. Mpe na kuvwandaka ya kulonguka, mu banza ti yandi vwandaka tambula mbote, mpe nyonso yina, mutindu mama ya yandi longaka yandi.

³¹ Mpe yandi vwandaka ntwenya mosi ya bakala, mpe, samu ti, beno tala, yandi vwandaka yimeni mvwama. Mpe yandi vwandaka kaka ntwenya ya bakala, mu banza ya bamvula kumi na nana, kaka na ngaanda ya lukolo ya bambuta, mpe yandi vwandaka mvwama. Ntangu yayi, beno me mona, yandi vwandaka na mutindu ya mbote ya mulongisi samu na kulonga yandi na kutambula mbote. Mpe yandi vwandaka na mulongisi

ya mbote, tata ya yandi; tii dyaka ntwenya ya bakala mpe yandi vwandaka—yandi vwandaka mvwama na mbongo, yandi salaka ti yandi kuzwa mbongo mingi. Yandi lendaka vwanda ya kieleka. . . Yandi vwandaka mfumu, ata mpe na bamvula yina, ya vwandaka na bimvwama mingi. Beno me mona? Mpe ntangu yayi yandi vwandaka na mulongisi yina longaka yandi, longaka yandi kima ya mbote, mutindu yandi zolaka. . . Yandi vwandaka na ndongosolo ya yandi.

³² Mpe na manima mulongisi yankaka bakala yayi ya ntwenya kuzwaka, na yina ya ke tala na mutindu ba sansaka beno, kasi ntwenya ya bakala yayi vwandaka na malongi ya nsambulu na yinzo ya yandi.

³³ Ntangu yayi, bana yankaka, beno zaba ti ya kele na bana mingi ya fyoti yina kele ve na malongi ya nsambulu na yinzo? Tata ya bawu mpe mama ya bawu ke kwikilaka ve na Nzambi. Mpe tata ya bawu mpe mama ya bawu, ke kunwa malafu, ke kunwa makaya, ke nwana, mpe ke basika, na mosi na yankaka, na mpimpa, mpe nyonso, mpe ke lamba ve madia ya nkokila samu na bana ya bawu ya fioti ya babakala mpe bakento, mpe nionso. Beno kele ve na kyese ti beno kele na tata ya kieleka ya mbote ya Muklisto mpe mama? Ntangu yayi, ntangu beno kele na bana, beno zola ve kuvwanda mutindu mosi ya tata mpe mama mutindu tata ya beno mpe mama ya beno kele? Beno me mona? Ntangu yayi, kasi ya kele nyonso mbote.

³⁴ Ntangu yayi, ntwenya ya bakala yayi kuzwaka, mpe yandi vwandaka na malongi ya nsambulu. Beno me mona, ya vwandaka ntama mingi na yina bayankaka ya bawu kuzwaka, samu ti bawu kele ve na malongi ya nsambulu. Kasi ntwenya ya bakala yayi vwandaka na malongi ya nsambulu, samu ti, beno me mona, samu ti yandi tubaka ti yandi zitisaka Misiku kubanda yandi vwandaka mwana-bakala.

³⁵ Ntangu yayi beno nionso kele na milongisi ya mbote ya nsambulu, mpe, mosi na mosi ya beno. Mpe beno bana-bakento ya bantwenia mpe bana-babakala, beno nionso vwandaka na milongisi ya mbote, tata ya beno mpe mama ya beno awa na camp, kele na nyonso yina beno. . . konso nzikisa yina beno zaba, yina lenda salama, samu ti beno kukuma bakala mpe kento ya kulutila mbote, kisadi ya Nzambi.

³⁶ Samu ti, beno bambuka moyo, beno ke kufwa kilumbu mosi, to ba ke zangula beno na Mazulu. Mpe kana beno kufwa na ntwala ya Nkwizulu ya Yandi, beno ke zanguka ntete. Beno zaba yawu? Beno zaba bayina kufwaka. . . Kana mama mpe papa kufwa na ntwala ya nge, mpe Yesu ke kwisa ve na nsungi ya beto, nge zaba bayayi, tata mpe mama, ke basika ntete, ya nkembo, na ntwala ya nge? Beno me mona? Mpungi ya Nzambi ke wakana, mpe bantu ya kufwa na Klisto ke vumbuka ntete, mpe kuna beto yina ke vwanda ya moyo mpe ke bikana ke zanguka na bawu.

Beto ke soba mutindu yina. Beto fwana bambuka moyo, yina kele kima ya ngudi na luzingu. Beno me bakula ntangu yayi? Ya kele kima ya ngudi na luzingu, beto fwana sala, ya kele kukubama samu na kukutana na Nzambi.

³⁷ Ntangu yayi, kaka nsambulu ke simba ve. Beno me mona, ntwenya ya mfumu yayi awa, yandi tubaka, “Mulongisi ya mbote. . .” Ntangu yayi beno bambuka moyo, ntete mu tuba yawu. Ba longaka yandi na kutambula mbote. Yandi vwandaka na ndongosolo ya mbote. Ba longaka yandi. Mpe yandi vwandaka mvwama, mpe vwandaka mfumu, mpe yandi vwandaka na nsambulu. Kasi yandi vwandaka na ntuala ya dyambu yankaka, mpe ya vwandaka na ntuala ya beto nyonso, Luzingu ya Kukonda nsuka. Nsambulu ke pesaka beto ve Luzingu ya Kukonda nsuka. Nsambulu, kele vwale, kasi ya ke pesa beto ve Luzingu ya Kukonda nsuka. Mpe kasi, yandi longaka na milongisi ya kulutula mbote yina vwandaka, yandi vwandaka kondwa kima mosi. Mpe ntwenya ya bakala zabaka yawu, samu ti yandi tubaka, “Mulongisi ya mbote, yinki mu lenda sala samu na kubyadila Luzingu ya Kukonda nsuka?”

³⁸ Ntangu yayi, beno, beno ke kwikila ti Yesu kele Nzambi, mutindu yina ve? Na yawu Yandi zabaka mabanza ya ntwenya ya bakala, na yawu Yandi tubaka, “Beno zitisa Misiku.” Yandi vutukaka kaka na nsambulu ya yandi, samu na kumona yina yandi zolaka tuba samu na nsambulu ya yandi. Yandi tubaka ntangu yayi, na nzonzolo yankaka, “Landa nsambulu ya nge.”

³⁹ Yandi tubaka, “Mu salaka yayi, kubanda mu vwandaka mwana-bakala ya ntwenia,” bana-babakala ya fioti mutindu nge. “Mama ya munu mpe papa ya munu, mpe nganga-Nzambi ya munu, longaka munu nsambulu. Kasi mu zaba, na nsambulu ya munu, ti mu kele dyaka ve na Luzingu ya Kukonda nsuka.” Beno me mona?

⁴⁰ Beno lenda vwanda mbote. Beno yiba ve. Beno kunwa tabaka ve. Beno vuna ve. Beno vuna ve papa mpe mama. Beno tuba yawu ntete ve, samu ti, mosi na mosi ke tuba, na yina ya kele mpasi ve kutuba mosi na yankaka, beno me mona. Kasi beno fwana sala yawu ve. Beno tuba ve luvunu ya ntete.

⁴¹ Beno zaba ti nzutu ya beno kele ve ya kusala luvunu? Beno zaba, bawu kele na masini mosi ntangu yayi, ya kele—ya kele na ba-nerf ya beno. Ba lendaka kutula mwa mutaku ya fioti pene-pene ya kinkoso ya bawu *awa*, mpe kutula yankaka na yintu ya beno, mpe kuna beno lenda tuba kuna, kutuba, “Mu—mu—mu vunaka samu na yawu, kasi mu lenda tuba yawu kukondwa mpasi ti bawu—bawu ke kwikila ti mu ke tuba yawu kieleka.” Mpe beno lenda tuba. . .

⁴² Bawu lendaka kutuba, “Nge vwandaka na kisika kingandi, nge vwandaka na roulotte ya Mpangi Shantz, na ntangu Mpangi Branham longaka, Lumingu na manima ya kilumbu yayi?”

Mpe beno ke tuba, “Ve, tata. Mu vwandaka kuna ve. Ve, tata.”

43 Beno zaba yinki detecteur ya luvunu yina ke tuba? “Yinga, tata, nge salaka yawu. Yinga, tata, nge salaka yawu.”

Beno ke tuba, “Mu salaka yawu ve.”

Ya ke tuba, “Yinga, nge salaka yawu.”

44 Samu na yinki? Samu ti luvunu kele kima mosi ya boma. Nzutu me salamaka ve samu na kuvuna. Mpe ya kele kima mosi ya boma, tii ya ke tula mvaka na sysiteme ya muvimba ya misisa ya yintu, ntangu beno ke vuna. Fiou! Ya kuvwalangana mutindu yina, ya ke pesa beno bamputa na kifundu, ya ke matisa buboko, ya ke kufwa beno. Mpe kuna luvunu kele kima ya yimbi, samu ti, beno me mona, beno fwana vuna ve, kuyiba, kusala bima yayi.

45 Ntangu yayi, na yawu ntwenya ya bakala mu banza yayi vwandaka . . . yandi vunaka ve, yandi yibaka ata mbala mosi ve, mpe yandi vwandaka zaba ti yandi vwandaka na nsatu ya . . . Luzingu ya Kukonda nsuka. Na yawu yandi tubaka, “Yinki mu lenda sala na kuzwa Yawu?”

46 Mpe Yesu ke na kulakisa awa ntangu yayi ti nsambululu ke sala yawu ve. Na yawu Yandi fidisaka kaka yandi, mpe tubaka, “Landa Misiku.”

47 Yandi tubaka, “Mulongi, mu me sala yayi kubanda mu vwandaka mwana-bakala ya fioti, to mwa, ntangu kaka mwa muntu ya fyoti mu salaka yayi.” Kasi yandi zabaka ti yandi vwandaka ve na Luzingu ya Kukonda nsuka. Na yawu Yandi tubaka kuna, “Kana beno kota na Luzingu, Luzingu ya Kukonda nsuka, beno zola kuvwanda ya kulunga, na yina beno kwenda teka yina . . .”

48 Beno me mona, ntangu yayi, ya kele nyonso ya kulunga na kuzwa mbongo. Beno me mona, ya kele nyonso ya kulunga na kuzwa mbongo, kuvwanda mvwama. Mpe vwanda mfumu, ya kele nyonso ya kulunga. Kasi ya—ya kele mutindu beno ke salaka na manima beno me kuma yawu, beno me mona.

49 Yandi tubaka, “Kwenda teka yina kele na nge, mpe pesa yawu na bamputu, bantu yina kele na kima mosi ve; na yina beno kwiza, landa Munu, mpe nge ke kuzwa bimvwama na Mazulu.” Kasi ntwenya ya bakala vwandaka na mbongo mingi tii yandi zabaka ve yinki kusala na yawu. Ntangu yayi, beno me mona, yandi vwandaka ya kuzabana mingi, ntwenya ya bakala yina vwandaka.

50 Mpe yandi—yandi—yandi vwandaka na bisadilu samu na luzingu, mutindu tata ya yandi mpe mama ya yandi, mpe banganga-nzambi mpe bawu nionso, vwandaka pesa yandi bisadilu, kasi yandi zabaka ti yandi vwandaka kondwa kima mosi. Ntangu yayi mu ke na kuzonzaka na bakuluntu. Yandi, yandi zabaka ti yandi vwandaka kondwa kima, mpe yandi

vwandaka ve na Luzingu ya Kukonda nsuka. Yandi zabaka yawu. Beno me mona?

⁵¹ Nsambulu ke basisa ve Luzingu ya Kukonda nsuka. Mitindu, kuningana ya nzutu, beno ke kuwa kima mosi; beno—beno lendaka kuzwa boma, mpe kuwa kima mosi. Beno me mona? Ke dila, ya kele mbote; ke boka, ya kele mbote; kasi ya kele dyaka Yawu ve, beno me mona. Beno kele na ntwala ya Luzingu ya Kukonda nsuka.

⁵² Beno ke tuba, “Mbote, mu me vwanda kaka Baptiste ya kukwikama, to ya ba-Methodiste, to ya ba-Presbytérien, to ya ba-Pentecotiste.” Yina kele kaka kyuvu ve.

⁵³ Ntwenya ya bakala yayi vwandaka, mpe, ba longaka yandi na nsambulu ya kilumbu, kasi yandi vwandaka kaka ve na Luzingu ya Kukonda nsuka, na yina yandi zolaka zaba yinki ya kusala. Ba twadisaka yandi mbote, tii na Yayi. Kasi ntangu yandi vwandaka na ntwala ya Yawu, yandi mangaka na kuvwanda ya kutwadisa na Luzingu ya Kukonda nsuka, to samu na kutwadisama. Bantwadisi ya yandi yankaka simbaka yandi tii kuna yandi zolaka ve kubika yawu. Beno me mona?

⁵⁴ Ntangu yayi, ya kele kima mutindu yina Mpangi Branham ke na kutuba. Ya ke sala mwa mudindu mingi samu na beno, beno me mona.

⁵⁵ Ndongosolo kele mbote, beno fwana kwenda na lukolo mpe kulongoka. Beno me mona, ya kele mbote, kasi yina ke vulusa beno ve. Samu na kuzwa mbongo mingi, ya kele mbote, beno lenda telemisa bana ya beno, kupesa bawu bilele ya mbote mpe nyonso. Mpe mutindu papa na mama me sala samu na beno nionso, mpe nionso yina. Yina kele mbote, kasi yina ke vulusa beno ve. Beno me mona? To, beno lenda kota na laboratoire mpe kulongoka mutindu ya kutula bima yankaka kintwadi, to kupasuka ya ba-atome, to nyonso yina bawu ke sala, mpe—mpe ke kota na ditadi mpe—mpe ke kwenda na ngonda, kasi yina ke vulusa beno ve.

⁵⁶ Beno fwana kutana kima mosi, Luzingu ya Kukonda nsuka, mpe ya kele kaka na Muntu mosi Yina lenda pesa Yawu na beno. Mama lenda pesa Yawu ve na nge. Tata lenda pesa Yawu ve na nge. Pasteur ya nge lenda pesa Yawu ve na nge. Ntwadisi ya beno awa lenda ve kupesa Yawu na beno. Muntu nyonso yina ke kuzwa Luzingu ya Kukonda nsuka fwana kwiza na Yesu Klisto. Yandi kele Yandi Yina kaka lenda pesa Yawu kitini.

⁵⁷ Mulongisi ya beno lenda pesa beno ndongosolo, yandi lenda longa beno; beno fwana longuka yawu. Mama ya beno—ya beno lenda longa beno na kutambula; beno fwana longuka na kutambula. Tata ya beno lenda longa beno wapi mutindu kuvwanda muntu ya mumbungu, to yinki; beno fwana longuka yawu. Kasi kaka Yesu lenda pesa beno Luzingu ya Kukonda nsuka. Beno me mona?

⁵⁸ Nganga-Nzambi ya beno, ntwadisi ya beno, to nionso yina, lenda longa beno nsambulu ya beno, beno lenda longuka Nsangu yina beto ke na kumeka na kulonga, kasi dyaka yina ke pesa beno ve Luzingu ya Kukonda nsuka. Beno fwana ndima Muntu yayi, Yesu Klisto. Beno me bakula yawu, beno nionso? Fwana kundima Muntu, Yesu Klisto, samu na kuzwa Luzingu ya Kukonda nsuka. Ntangu yayi, kasi bantangu yankaka lutwadusu yankaka ke kuzwaka kubendama ya kulutila mingi na zulu ya beto tii beto ke zaba ve yinki kusala na yina wapi ntangu ntangu yina—ntangu yina ke kwisa.

⁵⁹ Ntangu yayi, wapi mutindu ya kima ya nene ya kele kumanga lutwadusu ya Luzingu ya Kukonda nsuka, samu ti, beno me mona, ya kele Luzingu yina lenda ata mbala mosi ve nsuka. Ntangu yayi, malongi, ya kele mbote, yina ke sadisa beto awa. Mumbongo, ya kele mbote. Mbongo, ya kele mbote. Vwanda mwana-bakala ya mbote mpe mwana-kento, ya kele mbote. Kasi, beno me mona, ntangu luzingu me kumana awa, yimeni. Beno me bakula? Beno bakuluntu me bakula? Beno me mona, kaka yina. Kasi na yina beto fwana ndima Yesu Klisto, samu na Luzingu ya Kukonda nsuka. Yesu kaka lenda twadisa beno na Yawu.

⁶⁰ Mpe ata ti, beno me mona, ntwenya ya bakala yayi salaka bima nyonso yayi na lukolo, mpe na nzila ya bibuti ya yandi mpe nyonso, yandi—yandi zimbisaka kima ya kulutila nene yina yandi zolaka kuzwa, lutwadusu ya Mpeve-Santu, samu Yesu tubaka, “Kwisa, landa Munu.”

⁶¹ Mpe beno bana ya bakento yina me basika kaka na lukolo, beno me kuzwa diplome mu banza, bayankaka ya beno, ntama mingi ve, mpe beno bantwenia ya babakala; lutwadusu ya kulutila nene kele Yesu Klisto, samu ya kele Lutwadusu ya Luzingu ya Kukonda nsuka. Ntangu yayi, Bantwadisi yayi ya bantu nionso, ba me pesa bawu bweso ya kusoola.

⁶² Mpe ya kele kima mosi ya nene yina beto ke na yawu na luzingu, ya kele kusoola. Kilumbu mosi. . . Beno zaba, papa na mama, ba soolaka na kuzwa mwana-bakala ya mbote mpe mwana-kento, mutindu beno—beno nionso.

⁶³ Na yina, beno—beno kele na muswa, na manima ya mwa ntangu fyoti, samu na kusola kana beno zola kulongoka na mulongisi, to ve. Mulongisi lenda longa beno, kasi beno lenda vwanda kaka mwana-bakala ya yimbi, beno ke longuka kaka ve; mwana-kento mosi, ya yimbi, ke kuwa ata fioti ve. Beno me mona, beno—beno kele na nsodolo ya kusala yawu, kasi beno kele fioti.

Mpe mama ke tuba, “Nge me kuzwa ba A na zulu ya bulletin ya nge?”

“Ve, mu me kuzwa ya yimbi mingi.” Beno me mona, ntangu yayi beno lenda. . .

64 Mama ke tuba, “Ntangu yayi beno fwana longuka.” Mpe beno fwana sala yawu kuna, kulandila na kulongoka mutindu mama tubaka na beno, mutindu papa tubaka na beno. Beno me mona, beno fwana longuka.

65 Kasi beno kele na nsodolo, beno lenda sala yawu to kusala yawu ve. Beno lenda tuba, “Mu zola ve.” Beno me mona, beno kele na nsodolo.

66 Na manima ya mwa ntangu fyoti, beno ke kuzwa nsodolo ya mwana ya kento yina beno ke kwela, wapi mwana ya bakala beno ke kwelana.

67 Beno kele na nsodolo bisika nyonso na luzingu. Mpe kuna beno kele na nsodolo, dyaka, kana beno zola kuzinga na manima ya luzingu yayi; to beno vwanda kaka muntu ya mbote, ya kuzabana, mbwetete ya sinema, to kima yankaka, to kima yankaka.

68 Mpe beno tala bana-bakento yayi ya fioti awa na ndinga yina ya kitoko, ntama mingi ve, ke yimbila. Mwana yayi kusadila mingi ndinga yayi, mpe yandi ke vwanda muyimbi ya opéra, to muyimbi mosi. Mu ke kuwa mwa bandinga yayi ya bana-babakala, bana-babakala, beno lenda vwanda mutindu Elvis Presley, na kutekisaka bukuluntu ya beno. Beno me mona, beno zola yawu ve. Beno me mona, ya kele mayele yina Nzambi pesaka beno, mpe beno fwana soola nani, kisika beno ke sadila talanta yina, samu na Nzambi, to kana beno ke sadila yawu samu na dyabulu. Beno me mona?

69 Mpangi Leo awa, mpangi ya nge ya bakala, beno me mona, ntangu yayi yandi vwandaka na mayele ya nene, samu na kutwadisa bantu. Ntangu yayi yinki yandi ke sala na yawu? Yandi ke kota na mumbongo mpe ke kukisala yandi mosi millionaire; to yandi lendaka kwisa awa mpe kusala yinzo kisika wapi bantu yina ke zola kuvwanda kintwadi mpe kuvukisa beno nionso bana ya fioti? Beno me mona, beno fwana soola yina beno ke sala.

70 Mosi na mosi ya beto fwana sala nsodolo. Mpe ba me tula yawu na ntwala ya beto. Kasi beto nyonso kele na ntwala ya kima mosi yayi: “Yinki beto ke sala samu na Luzingu ya Kukonda nsuka? Beto ke zinga awa na manima, to ve?” Na yina beto fwana kwiza na Yesu, samu na kuzwa Yawu. Bweso ya kusola, ya kele kima mosi yina Nzambi pesaka beto. Yandi ke kwikaka beto yawu ve. Yandi ke bika kaka beto kusala nsodolo ya beto mosi. Na yina beno fwana vwanda ve ya kukwika, kasi kusala kaka nsodolo ya beno mosi.

71 Ntangu yayi beto landa kaka yayi, bakuluntu mpe nyonso ntangu yayi, baminuti fyoti, mpe bana, beto nyonso kintwadi. Beto landa ntwenya ya bakala yayi, mpe nsodolo yina yandi salaka, mpe kumona kisika yawu twadisaka yandi.

⁷² Ntangu yayi, bana-bakento yayi na bandinga yina ya kitoko, bana-babakala yayi ya bantwenia. Ntangu yayi mbala yankaka nge ke kwisa mpe nge ke vwanda na ndinga mosi samu na kuyimbila. Ntangu yayi beno baka kaka kima mosi yina, beno lenda, oh, beno lendaka kuzwa yawu kilumbu mosi, “Mu. . .”

⁷³ Beno zaba mwana-bakala yayi yina ba ke bokilaka Elvis Presley? Beno me kuwaka ba-bande ya munu. Beno me kuwaka mutindu mu ke vwezaka mwana-bakala yango ve, kasi mwana-bakala yina vwandaka na bweso yina kele na beno nionso. Beno me mona, mpe yina yandi. . . Yandi monaka ti yandi lendaka yimbila. Mpe beno tala yina yandi salaka, kaka kima mutindu mosi Judas salaka, Judas Iscariot, yandi tekaka Yesu. Yesu pesaka mwana-bakala yina ndinga yina ya mbote. Mpe yinki yandi salaka? Beno baluka mpe beno teka yawu na diabulu. Beno me mona, yandi fwana kuma na nsuka ya nzila. Beno me mona? Yandi mangaka na kutambula na Yesu.

⁷⁴ Ntangu yayi ntwenya yango ya bakala yayi awa, ntwenya ya mfumu yayi ya mvwama, yandi salaka kima mutindu mosi. Beto landa mpe beto mona yina yandi salaka. Kukondwa ntembe, na muntu ya nene yina yandi vwandaka, mu banza bakala ya ntwenya ya kitoko, na bansuki ya ndombe ya kubenda na lweka, na bilele ya kitoko. Bantwenya ya bakento banzaka, “Bakala, ya kele ntwenya ya bakala!” Oh, bawu zolaka. . . Mu banza yandi ke sala bawu kidimbu ya diboko, mpe na manima ba ke basika na yandi, mpe nionso.

⁷⁵ Mpe yandi banzaka ti yandi vwandaka muntu ya nene, muntu, beno me mona, samu yandi vwandaka kitoko, yandi vwandaka ntwenia. Yandi vwandaka tala kuna ve na nsuka ya nzila. Yandi vwandaka tala kaka awa. “Mu kele ntwenya. Mu kele kitoko. Mu kele mvwama. Mu lenda sumba nyonso yina mu zola. Mu lenda baka bana-bakento yayi, mpe, bakala, bawu nyonso mutindu munu. Mpe bawu zaba ti mu kele muntu ya nene.” Mpe, beno me mona, yandi vwandaka na nyonso yina. Yandi landaka bandongosolo ya tata ya yandi, mpe nionso yina. “Mpe mu kele musambidi ya kieleka. Mu ke kwendaka na yinzo-Nzambi.” Mpe ntangu yayi yandi lendaka landa yawu, beno me mona; ya kuzabana mingi, ya mvwama, mpe ya kuzabana. Mpe, mpe yandi. . .

⁷⁶ Kaka mutindu bubu yayi, mutindu beno kuzwaka ntangu ya mbote ya kukuma star ya cinema, beno me mona, to kima mutindu yina. Bana ya fyoti mingi bubu yayi, beno ke zonga na bawu, bawu zaba mingi na yina me tala ba-star yayi ya sinema kulutula na yina bawu zaba na yina me tala Yesu. Beno me mona? Mpe, beno me mona, beno—beno bana ke na kulongoka na yina me tala Yesu. Kisika wapi ba ke vwandaka, mpe bantu yankaka ke na kusakana na film mosi, to kima yankaka, bawu zaba bisadi mpe nyonso kuna, nyonso yina me tala yawu. Bawu zaba nyonso ya kulutula mbote na *Yina*. Beno ke tuba na bawu samu na yina

me tala Biblia, bawu zaba kima mosi ve samu na Biblia. Beno me mona, ya ke sala nsodolo ya yimbi. Ntangu yayi, miyimbi yankaka ke na kuteka mayele yina Nzambi pesaka bawu, samu na nkembo!

⁷⁷ Na yina beto ke mona yandi na nsuka ya luzingu. Beto landa yandi mwa ntama dyaka. Beno zaba yina Biblia ke tuba samu na ntwenya ya bakala yayi? Yandi me kuma ya kulutila mbote. Na yawu, bantangu yankaka lunungu zola kutuba ve ti beno me sala nsodolo ya mbote. Beno zaba yina yandi salaka? Yandi kwendaka mpe kuzwaka bantangu ya nene, mpe bawu vwandaka na kati ya bafeti ya nene, mpe vwandaka basisa mbongo mingi mpe nyonso, na zulu ya bana-bakento mpe nyonso. Mpe na manima yandi kwelanaka mpe mu banza yandi vwandaka na dibuta mosi. Mpe—mpe yandi—yandi kumaka kaka na bimvwama mingi ti yandi zolaka tunga bibumbulu ya malu-malu mpe nyonso. Mpe yandi tubaka, “Beno me mona, mu landaka Yesu ve, mpe beno tala yina mu me kuzwa!” Beno me mona?

⁷⁸ Beno lenda kuwa bantu kutuba yawu, mpe mu kele, “Mbote, tala, Yandi me sakumuna munu.” Yina zola kutuba yawu nyonso ve. Beno me mona?

⁷⁹ Mpe na manima ya mwa ntangu fioti bibumbulu ya yandi fulukaka tii yandi tubaka, oh, diaka, “Moyo ya munu, pema na kiese. Mu ke na mbongo mingi mpe lunungu mingi! Mpe mu ke muntu ya nene mingi! Mu kele ya ba-club nionso. Mpe mu kele na bimvwama ya yinza na maboko ya munu. Mu ke na bikunku ya nene ya bantoto mpe binkuku ya mbongo, mpe, oh, la la, kuna muntu nionso ke zolaka munu, muntu ya kulutila mbote na kuvwanda.”

⁸⁰ Kasi beno zaba, Biblia ke tuba yawu, na nkokila yina, Nzambi tubaka na yandi, “Mu ke lomba moyo ya nge.”

⁸¹ Na yina yinki salamaka? Ntangu yayi ya vwandaka na mulombi, Muklisto ya kiboba ya mputu yina lalaka kuna na mwelo ya yandi. Mpe kaka na ntangu bawu. . .

⁸² Kuna na Jérusalem, na zulu kuna, bawu—bawu ke kudyaka na zulu ya muludi ya yinzo. Mpe bitini ya dimpa ke kubwaka mutindu *yayi*, mpe bitini ya nsuni, mpe nionso yina, ke kubwa na ntoto ntangu ba ke losa yawu. Mpe bawu ke lokuta yawu ve, samu ti na Jérusalem nyonso, mbanza ya ntama, ya—ya kele. . .

⁸³ Ya kele mbote mingi na kutuba mwa nsaka awa? Ba kele f-o-b. Beno zaba yinki ya kele? Flies on the bread [Banzinzi na zulu ya dimpa—Mu.], flies on the beef [banzinzi na zulu ya ngombe], flies on the butter [banzinzi na zulu ya manteka], f-o-b, banzinzi na zulu ya bima nionso. Bawu ke basikaka kuna na bala-bala, na kati ya ba-caniveau mpe nionso, mpe bawu ke kwisa mpe ke mata na zulu ya yawu.

⁸⁴ Na yina bantu yayi kuna, ba ke mata na zulu ya—ya kivinga. Mpe bawu ke kudyaka, mpe na manima bawu ke losa *yayi*,

mpe na manima bawu ke kombula yawu. Mpe bayimbwa, na babala-bala, ke kudya mwa bitini ya mampa. Mpe yandi bikaka Muklisto yayi ya mputu ya kulala kuna na bala-bala mpe ke kudia kaka mwa bititi ya mampa yina vwandaka kubwa na dilonga ya yandi katuka na mbeto ya yandi, to katuka na mesa ya yandi.

⁸⁵ Mpe na yina ntangu yandi kumaka, na manima ya mwa ntangu fyoti, yandi vwandaka na bamputa mingi, mpe yandi vwandaka ve na kima ya kutula na zulu ya bamputa ya yandi. Nkumbu ya yandi vwandaka Lazare. Mpe bayimbwa kwisaka mpe lekitaka bamputa ya yandi samu na kumeka na kubeluka.

⁸⁶ Mbote, beno zaba, na manima ya mwa ntangu fyoti, muntu ya bimvwama yayi, ntangu, yandi monaka ti yandi kuzwaka mbongo ya kusumba bankisi ya mutindu na mutindu, kana yandi vwandaka na kimbevo, yandi vwandaka na badokotolo ya mutindu na mutindu. Kasi, beno zaba, bantangu yankaka badokotolo lenda sadisa beto ve, bankisi ke sadisa beto ve, kima mosi ve lenda sadisa beto; beto kele na kyadi ya Nzambi. Mpe yandi kumaka na nsuka ya nzila ya yandi; badokotolo lendaka ve kusadisa yandi, mpe minganga lendaka ve kusadisa yandi, mpe bankisi lendaka ve kusadisa yandi, mpe yandi kufwaka. Mpe kuna ntangu moyo ya yandi bikaka nzutu ya yandi, beno me mona, yawu bikaka mbongo ya yandi nionso, malongi ya yandi nionso, bima nionso yina yandi kuzwaka, kuzabana ya yandi nionso. Bawu pesaka yandi matanga ya kulutila nene, mu banza ti ba kulumusaka dalapo, mpe—mpe mfumu ya mbanza kwisaka, mpe bawu, mpe mulongi kwisaka mpe—mpe tubaka, “Mpangi ya beto ya bakala ntangu yayi me kwenda na Nkembo,” mpe nyonso mutindu yina.

⁸⁷ Kasi Biblia ke tuba, ti, “Yandi zangulaka meso ya yandi na difelo, na kati ya nkwasusu, mpe talaka ntama na dibulu yina ya nene kuna, mpe monaka mulombi yina vwandaka ya kulala, kuna na kielo ya yandi, kuna na Zulu. Mpe yandi bokaka, ‘Fidisa Lazare awa na mwa maza. Milaka yayi ke na kukwamisa.’ Yandi tubaka, ‘Oh, ve. Nge me mona, nge me sala nsodolo ya yimbi na luzingu.’”

⁸⁸ Beno me mona, ntangu yandi kumaka na nsuka ya nzila, samu na kubasika na luzingu! Ba twadisaka yandi na nzila ya nsambulu. Ba twadisaka yandi na ndongosolo. Ba twadisaka yandi na nzila ya kubendama ya lunungu ya yandi—ya yandi. Kasi, beno me mona, yandi vwandaka ve na kima ya kusimba diboko ya yandi, bima yango na nsuka kuna. Beno me bakula, mwa muntu yango? Beno bakuluntu ke salaka. Yina mu kele. . . Beno me mona, yandi vwandaka na kima ve ya kusimba yandi. Mbongo ya yandi zolaka simba yandi ve. Bankundi ya yandi na badokotolo lendaka ve kusimba yandi. Bankisi lendaka ve kusimba yandi. Nganga-Nzambi ya yandi, nsambulu ya yandi, lendaka simba yandi ve. Na yina, ya vwandaka kaka na kima

mosi samu na yandi na kusala. Yandi—yandi mangaka na kundima Yesu, Luzingu ya Kukonda nsuka. Na yawu yinki yandi zolaka sala? Kudinda na lufwa, na difelo. Wapi kyeta ya nene yina bakala ya ntwenia kuzwaka ntangu yandi mangaka na kutambula na Yesu, kutwadisama na Yesu. Yandi mangaka na kusala yawu.

⁸⁹ Bantu mingi ya bantwenia ke sala kifu yina, bubu yayi, ba ke manga na kutwadisama na—na Mfumu Yesu. Ntangu yayi beto ke mona wapi kima ya nene ya kele kumanga Luzingu ya Kukonda nsuka mpe kuvwanda ya kutwadisa na Yesu, Lutwadusu, ntangu Yandi tubaka, “Kwisa, landa Munu.”

⁹⁰ Beno me mona yina mwa bakala yayi ya kitoko tubaka na manima ya midi yayi? Ntangu beno ke basika na lukolo, ntangu beno ke basika, beno ke na nsatu ya ntwadisi yankaka, kasi bika ya vwanda Yesu. Mpe Yesu kele Biblia. Beno ke kwikila yawu? Yayi kele Luzingu ya Yesu mpe Misiku ya Yandi na beto, na mutindu ya mukanda. Na yawu beto fwana tala na kati ya Yayi, samu na kumona. Yayi kele dinaka. Yayi kele kalati yina Yandi tubaka na beto na kulanda, samu—samu na kukutana na Yandi, Luzingu ya Kukonda nsuka.

Ntangu yayi beto ke mona ti ntwenya ya bakala yayi vwandaka ya kuzimbana.

⁹¹ Ntangu yayi beto baka yankaka. Beno ke zola, beno ke kuzwa ntangu ya kubaka mfumu yankaka ya bimvwama, yina salaka kutambula ya mbote? Beno zola kuwa yawu? Mbote mingi, beto ke meka yawu ntangu yayi. Ntangu yayi beto baka ntwadisi yankaka ya mvwama ya ntwenya yina kutanaka na diambu ya mutindu mosi. Ntangu yayi beto ke mona kisika mwana-bakala yina kwendaka, yina zingaka luzingu mosi ya kitoko mingi, kasi yandi kufwaka mpe yandi zimbanaka na difelo. Mpe ntangu yayi awa beto ke zonzila na ntwenya ya bakala yankaka yina vwandaka na ntwala na kima mutindu mosi. Yandi vwandaka muntu ya bimvwama, ntwenya ya bakala, mpe vwandaka mfumu, mpe, kasi yandi ndimaka lutwadusu ya Klisto; mutindu mwana-bakala yayi ya fioti tubaka na beto ntama mingi ve, ti beto lendaka bika kutwadisa beto. Yandi ndimaka yawu.

⁹² Masonuku samu na yayi kele, kana beno zola kutala yawu na manima mu me manisa, beno me mona, kele na Hébreux, kapu ya 11, mpe nzila ya 23 tii na nzila ya 29. Beno bika mu tanga kaka Yawu. Ya kele mbote? Beno ke vibidila munu kaka mwa fyoti, mutindu yina ve? Beno ke banza ve kana mu sala yawu ve, beno zola? Beno me mona? Na yawu beto kaka . . . Beto ke tanga kaka yayi, kuna beno ke tuba, “Mu kuwaka Mpangi Branham kutanga yayi na Biblia.” Beno me mona? Mpe beno zaba ti ya kele kuna. Ya vwandaka ve yina mu tubaka, ya kele yina Yandi

tubaka. Ntangu yayi beno kuwa awa, yina Biblia me tuba awa na muntu yayi ya mbote, beno me mona. Ntangu yayi beno tala.

Na lukwikilu Moise, ntangu yandi butukaka, ba bumbaka yandi bangonda tatu na bibuti ya yandi, samu bawu monaka ti yandi vwandaka mwana ya kntoko; mpe bawu vwandaka ve na boma ya musiku ya ntinu.

Na lukwikilu Moise, ntangu yandi...kumaka na bamvula mingi, yandi mangaka ti ba bokila yandi mwana ya mwana ya Pharaon ya kento; (beno kuwa)

Yandi soolaka na kutala mpasi na bantu ya Nzambi, na kisika ya kutala mpasi na biese ya disumu ya nsungi;

Talaka nsoni ya Klisto . . .

⁹³ Kuna na ntangu ya Moise, ya vwandaka kaka Klisto. Beno me mona? Yandi kele kaka Yina kele na Luzingu ya Kukonda nsuka. Beno me mona?

⁹⁴ “Talaka nsoni,” ba ke bokila yandi fanatiki, exalté, to kima mutindu yina, beno zaba. Beno me mona?

Talaka nsoni ya Klisto kimvwama ya kulutila nene na bimvwama ya Egypte: samu ti yandi vwandaka zitisa musendo ya . . . ndandu.

⁹⁵ Ntangu yayi beno zaba yinki ya zola kutuba? Ya zola kutuba yayi, ti, Moise butukaka mwana ya bakala ya mputu, ya mputu ya kulutila. Nkumbu ya tata ya yandi vwandaka Amram. Nkumbu ya mama ya yandi vwandaka Jockebed. Mpe ba vwandaka bamputu ya kulutila, kasi ba vwandaka Baklisto. Ba vwandaka sala ngolo. Ba vwandaka na kimpika. Ba zolaka sala babiliki ya poto-poto, mpe nionso yina, samu na ntinu ya kiboba. Beno zaba yinki? Mwana ya kento ya ntinu yina kwendaka kuna, kilumbu mosi, na nzadi kisika mama . . .

⁹⁶ Mama ya Moise, Jockebed, bakaka yandi mpe tulaka yandi na kati ya mwa kipusu yina vwandaka kuleluka na zulu ya nzadi mutindu yina. Mpe bangandu ya ntama kudiaka ba-bébé nionso ya fioti; mpe ba vwandaka kufwa bawu, ba vwandaka losa bawu na nzadi. Kasi bawu tulaka yandi kaka kuna. Mpe beno zaba wapi mutindu ya nataka bangandu ntama na yandi? Yandi salaka mwa—mwa nzanza yayi kuna yandi tulaka yandi, yandi salaka yawu na budimbu. Beno zaba yina ya kele? Ya kele térébenthine. Ngandu ya nene ke kwisa kuna, ke tuba, “Hum, mwa Hebreux ya nene, mu ke kuzwa yandi!” Mu ke kuwa yandi kudila mutindu yayi. Yandi kwendaka kuna, “Fiou! Wapi nsunga! Uh!” Beno me mona? Beno me mona, mama vwandaka ya kutwadisa, wapi mutindu kukeba bébé ya yandi. Na yawu yandi vutukaka manima na yawu, yandi vwandaka zola ve kima ya kusala na yawu.

97 Mpe na manima yandi kwendaka na nzadi, mwa ntama mingi ve. Mpe mwa mpangi ya yandi ya kento, na nkumbu ya Miryam, landaka yandi kuna na nzadi, yandi talaka mbote yinki . . .

98 Mpe na manima mwana ya kento ya Pharaon kubasikaka mpe zolaka kuzwa yandi, beno zaba, mpe yandi basisaka yandi. Beno zaba, nyonso . . . Beno zaba, mama ya beno ke banzaka ti beno kele mwana ya kitoko na yinza; beno me mona, yandi fwana sala yawu. Kasi Biblia ke tuba ti mwana-bakala yayi ya fioti vwandaka kitoko mingi, mwana-bakala mosi ya kitoko mingi. Mpe, oh, yandi vwandaka boka kaka mpe vwandaka bula mwa ba-talon ya yandi. Yandi vwandaka kondwa mama ya yandi, beno me mona. Mpe na yina beno zaba yina salamaka? Kuna Nzambi tulaka na mwana-kento ya Pharaon, mwana-kento ya ntinu, zola nionso yina mama lendaka kuzwa samu na bébé ya fioti. Ntima ya yandi kubwaka kaka samu na yandi. Yandi tubaka, “Yina kele bébé ya munu.”

99 Kasi, beno zaba, yandi vwandaka ntwenya ya kento. Beno me mona, bilumbu yina ba vwandaka ve na biberon yayi yina beno, ba-bébé, me sansama na yawu, na yina ba zolaka kwenda kuzwa mama yina vwandaka, yina vwandaka na bébé, mpe yina vwandaka na yandi, infirmière yina.

100 Na yawu Miryam vwandaka kaka kuna na diboko, yandi tubaka, “Mu ke kwenda baka nge mama ya mbote.”

“Mbote, nge kwenda baka yandi.”

101 Beno zaba nani Miryam kwendaka mpe bakaka? Mama ya Moise. Ya kieleka. Yinga, kwendaka mpe bakaka. Ya vwandaka ndwenga, mutindu yina ve? Mpe na yina na manima kwendaka mpe bakaka mama ya Moise. Mpe yandi tubaka, “Mu ke baka mpe ke telemisa mwana-bakala yayi ya fioti samu na nge.”

102 Yandi tubaka, “Nge zaba yinki, mu ke pesa nge bankama tatu ya ba-dollar, sabala mosi, samu na kusansa bébé yina. Mpe beno lenda bikana na yinzo ya kimfumu.” Beno me mona mutindu Nzambi ke salaka ntangu beno ke tula kivuvu na Yandi, beno me mona, ntangu beno kele kieleka ya lukwikilu. Bébé yina vwandaka profete, beno me mona, mpe yandi zabaka.

103 Na yawu bawu kwendaka na yinzo ya ntinu mpe—mpe yandi sansaka Moise, mpe mama, mama ya yandi mosi, mpe kele na bankama tatu ya ba-dollar, sabala mosi, samu na kukeba nyonso. Beno banza kaka na yawu!

104 Mpe na yina, beno zaba, na manima ya mwa ntangu fyoti, na manima ya yina landilaka mwa ntangu fyoti, Moise bandaka na kukuma kiboba mingi samu na kutanga mpe kusonika. Yandi longaka yandi wapi mutindu kutanga mpe kusonika. Mpe kuna yandi tubaka na yandi, yandi tubaka, “Moise, nge me butuka mwana ya mbote. Tata ya nge mpe munu sambilaka. Nzambi me monisa na beto ti nge kele profete, mpe nge ke vwanda mvulusi ya bantu, na bilumbu yina ke kwisa.”

105 Mpe beno zaba, ntangu yandi kumaka nene, na yina yinki yandi vwandaka? Ba pesaka yandi lukumu ya bana na dibuta ya ntinu. Oh, la la! Yandi zolaka ve . . .

106 Mpe yandi talaka bantu ya yandi mosi, mpe bawu vwandaka ve na bilele. Bawu vwandaka Baklisto, mpe bawu vwandaka dila. Mpe bamfumu ya bawu ya bisalu ya kisalu ya biboba vwandaka bula bawu fimbu, mpe menga vwandaka basika na mukongo ya bawu. Ba-cousin mpe banoko ya yandi—ya yandi, papa mpe mama, bawu nionso; ba vwandaka bula bawu na bafimbu, kuna na kati ya mabulu yayi ya poto-poto. Mpe na yawu, kasi Moise, vwandaka kima mosi kuna na kati ya ntima ya yandi, yandi zabaka ti ba vwandaka bantu ya Nzambi yina ba silaka. Yandi zabaka yawu.

107 Ntangu yayi, kima ya kulanda yina yandi zolaka sala zolaka kukuma ntinu. Yandi ke vwanda ntinu na zulu ya nyonso, muntu ya bimvwama, oh, mbongo nyonso ya Egypte. Mpe Égypte yalaka yinza, na ntangu yina. Kasi, beno tala, Biblia ke tuba, “yandi ndimaka nsoni,” samu na kuvwanda muntu ya bisalu ya poto-poto mutindu yina kuna, Muklisto. Ntangu ba vwandaka vweza bawu, mpe vwandaka seka bawu, ba vwandaka losa bawu. Kana ba tubaka kima na manima, ba vwanda kufwa bawu. Beno me mona? Kasi Moise soolaka na kukwenda na kimvuka yina na kisika ba bokila yandi mwana ya ntinu.

108 Beno tala yawu! Beno me mona, samu yandi monaka ntangu ya nsuka! Beno me mona ntwenya ya bakala yina? Kasi yandi monaka Yesu, mutindu beto ke mona Yandi na vision, ti ntangu ya nsuka kele yina ke kufuta. Ntangu yayi, mpe yandi ndimaka lutwadusu ya Klisto, mpe Moise ndimaka kiadi ya kulutila nene ya bimvwama.

109 Beno zaba, ntangu yankaka ntangu beno bana-babakala ya fioti na lukolo, bana-babakala ya fioti ke tuba bampova ya yimbi mpe bawu zola beno nionso kutuba yawu. Beno bana-bakento ya fioti; bana-bakento ya fioti ke tuba bima ya yimbi mpe ke zola beno nionso kutuba yawu. Beno ke tuba, “Ve. Mu kele Muklisto.”

110 Ba ke tuba, “Ah, beno babakala-bakento ya nene!” Beno zaba, beno kwenda mutindu yina.

111 Beno me mona, beno telama, beno tuba, “Mu kele na kyese na kuvwanda yawu.” Beno me mona? Samu ti, beno me mona, ya kele yina Moise salaka. Yandi ndimaka nsoni ya Klisto bimvwama ya bima ya kulutila nene na Égypte. Ntangu yayi beto landa yandi, ya kutwadisa na Klisto, mpe kumona yina yandi salaka.

112 Ntangu yayi, beno me mona, ntwenya ya bakala yayi vwandaka mvwama, ntwenya ya bakala, kasi yandi zolaka ve Klisto. Yandi zolaka kuvwanda ve kilandi ya Yesu. Mpe na yina beto ke mona yandi kuzabana mingi, mu banza me kuma star ya cinema, mpe bima ya nene, na bima nyonso yina yandi

lendaka sala, mpe nyonso yina yandi zolaka. Kasi ntangu yandi kufwaka, yandi vwandaka ve na muntu ya kutwadisa yandi. Na yawu, ndongosolo ya yandi, yina vwandaka mbote; mbongo ya yandi, yina vwandaka mbote; kasi ntangu lufwa kwisaka, yina vwandaka nionso, yandi lendaka diaka ve kusadila yawu. Yandi lendaka ve kusumba nzila ya yandi na Zulu. Mpe yandi lendaka ve, na nzila ya malongi ya yandi, yandi lendaka kwenda ve na Zulu. Benome mona?

113 Kasi ntwenya ya bakala yayi ntangu yayi, yandi vwandaka na bima nyonso yayi. Yandi longukaka, mpe. Yandi kele na mayela mingi. Yandi kwendaka na lukolo na ya yandi. . . Mama ya yandi longaka yandi, mpe—mpe yandi kuzwaka ndongosolo ya mbote. Mpe yandi vwandaka na mayela mingi, ti, mpe yandi lendaka longa ba-Egyptien. Yandi longaka milongisi ya yandi, yandi vwandaka na mayela mingi. Benotala mutindu yandi vwandaka na mayela mingi. Kasi, benozaba yinki, na zulu ya mayela nyonso yina, na zulu ya nyonso yina yandi kuzwaka, banzikisa yina yandi kuzwaka, yandi tubaka kaka, “Mu ke bika yawu nionso, samu na kulanda Yesu.” Benozabayin salaka na yandi? Bazabasisaka yandi. Yandi kumaka mpika ya potopoto mutindu bayankaka ya bawu.

114 Kasi kilumbu mosi ntangu yandi kumaka bakala ya kukula, yandi vwandaka keba mameme na manima ya ntoto ya kuyuma. Mpe yinkisalamaka? Muntu mosi tuba na munu yina salamaka? Yinki yawandaka? [Mwana mosi me tuba, “Yawandaka na Tiya na kati ya mulaka.”—Mu.] Ya kele kieleka, yawandaka na Tiya na kati ya mulaka, mpe Yawubendaka bukebi yawandi. Yandi balukaka. Mpe benozabayiniki?

115 Benoke tubaka, “Longabana.” Ntangu yayi bana ke telama mpe ke longa munu. Nayawu, mpe mwa mwana yawakalayayi awa, yandi kele kaka na—kaka nanzila yawmbote. Nani kele papa yanage? [Mwana me tuba, “Tata Shuler.”] Tata Shuler kele papa yanage. Bame longa mwana-bakalayina, mutindu yina ve? Mosi namosi yawawu meso vwandakatalanamutindu mosi, mosi samu nanakwenda nanntwala yanankaka, benome mona.

116 Nayawu ntangu yayi benotala, yandi salakayawu, mpe yina—mpe mulakayina bendakayandi, natiya, mpe yandi tubaka, “Mu ke baluka mpe ke monayinayawu kele.”

117 Mpe Nzambitubaka na Moise, “Katulabasapatu yanage, ntoto nge metelama kele santu. Mu mesoola nge nanakulumuka mpe kuvulusa bantu ya Munu. Mu ke pesanenge ngolo; nge lenda bula ntoto nanampasi, nge lenda balulamasanakiyanga, nge lenda basisabanzinzi mpe basidi. Kima mosi ve kesalanenge mpasi. Mu kesoola beno.” Samunayinki? Samuyandisoolaka Klisto. Benome mona? Benosoolaka Klisto, mpe Yandisoolakabeno. Benome mona? Ntangu yayi Yanditubaka, “Benosoolaka Munu, mpe Musoolakabeno nanakwenda kuna nanEgypte.”

118 Mpe beno tala yina yandi salaka. Yandi twadisaka mafuku zole ya bantu, mafuku zole ya bantu, bantu ya yandi, mpe nataka bawu na yinsi ya nsilulu. Mpe, ntangu yayi, yandi landaka. Beto ke landa yandi nzila nyonso ya ntoto ya kuyuma; mpe beno bana me kuwaka Mpangi Leo mpe Mpangi Gene, mpe papa ya beno mpe mama ya beno, beno tuba na beno yina nionso salamaka na ntoto ya kuyuma, mutindu yandi basisaka dimpa na mazulu mpe disaka bantu ya nzala, mpe bima yayi nionso.

119 Mpe ntangu yayi beto ke mona ti, yandi kele kiboba ya bakala ntangu yayi, yandi kele kieleka kiboba, yandi kele na bamvula nkama mosi na makumi zole. Mpe yandi kele na ntoto ya kuyuma.

120 Mpe bantu vwandaka kubaka yandi mbote ve, mpe. Beno me mona, bantangu yankaka bantu yina ke bokilaka bawu mosi Baklisto ke bakaka beno mbote ve. Kasi Yesu ntangu nyonso ke bakaka beno mbote. Beno me mona? Beno me mona? Na yina beto ke mona ntangu yayi ti bantu dasukilaka yandi, kasi yandi kangamaka kaka na bawu, na mutindu nionso. Mpe yandi vwandaka ntwadisi, mpe yandi zolaka bikana na bawu. Mpe Bawanzio ya Mfumu tubaka na yandi. Beno ke zola ve kuzwa yawu kusalama na beno? Kuna beno sala nsodolo ya mbote, mpe beno soola Yesu, mpe Yandi ke sala yawu.

121 Ntangu yayi, na yina beto ke mona ti, nsuka ya nzila, yandi kumaka kiboba ya kieleka. Yandi lendaka longa diaka ve, mpe ndinga ya yandi kumaka na nsi mingi. Na yawu yandi sakumunaka Josué, mpe mataka na zulu ya mongo, samu na kufwa.

122 Beno zaba yina salamaka ntangu yandi kufwaka? Kuna, yinki, yinki salamaka? [Mwana-bakala mosi me tuba, “Yandi kufwaka, mpe na manima Yandi vumbulaka yandi na lufwa.”—Mu.] Ya kele kaka kieleka. Ya kele kaka kieleka.

Ntangu yayi beno ke tuba, “Wapi kisika ya kele?”

123 Ntangu yayi, kaka minuti, mwana ya bakala kele kieleka, beno me mona. Yandi vumbukaka na lufwa. Ntangu yayi. (Miryam, mu zaba ti nge zabaka yawu. Um-hum. Beno me mona?) Ntangu yayi beno tala. Yandi vumbulaka yandi na lufwa. Samu na yinki? Samu ti, bamvula bankama nana na ntuala, awa yandi vwandaka kuna na Palestine, ya kutelama dyaka na Ntwadisi ya yandi, Yesu, yina ndimaka nsoni ya Nkumbu ya Yandi kimvwama ya kulutila nene na bimvwama nionso ya Egypte. Yandi ndimaka. . . Ntwadisi ya Yandi vwandaka kuna. Beno zaba, ba bokilaka Yandi. . .

124 Na—na kati ya Biblia, beno zaba, ya vwandaka na Ditadi yina kwendaka na Israel. Mpe ntangu Moise kubamaka samu na kufwa, yandi mataka na zulu ya Ditadi yayi. Mpe Ditadi yina vwandaka Yesu. Beno ke bambuka moyo ntangu Yesu vwandaka zonga, mpe na Santu Jean, kapu ya 6?

Mbote, yandi tubaka, “Batata ya beto kudiaka mana na ntoto ya kuyuma!”

¹²⁵ Yandi tubaka, yandi tubaka, “Tata ya Munu pesaka nge mana yina.” Yandi tubaka, “Yinga, bawu kudiaka mana. Ya kieleka. Mpe bawu kele, mosi na mosi, ya kufwa, samu ti bawu zolaka landila ve na kukwenda, beno me mona.” Yandi tubaka, “Bawu kele, bawu nionso, ya kufwa.” Kasi yandi tubaka, “Mu kele Dimpa ya Luzingu yina me katuka na Nzambi na Mazulu.”

¹²⁶ “Batata ya beto kunwaka na Ditadi. Moise bulaka Ditadi,” mpe tubaka, “mpe bamaza basikaka.”

Yandi tubaka, “Mu kele Ditadi yina vwandaka na yandi.”

¹²⁷ Mpe beno tala, ntangu Moise kufwaka, yandi tambulaka na zulu ya Ditadi yina. Beno zaba yinki salamaka? Biblia ke tuba ti “Bawanzio” kwisaka mpe bakaka yandi.

¹²⁸ Wapi luswaswanu na ntwenya ya bakala yina yankaka! Ntwenya ya bakala yina, beno me mona, ntangu yandi kufwaka, yandi vwandaka ve na muntu ya kusimba yandi, na yawu yandi me lutila kaka na kati ya mpimpa, na difelo, mpe yandi kele kuna ntangu yayi, kuna.

¹²⁹ Na yina ntangu Moise basikaka na luzingu, ntangu yandi kwendaka, yandi bakaka Ntwadisi. Mama ya yandi twadisaka yandi mbote, tata ya yandi longaka yandi mbote. Mpe na yina ntangu yandi kumaka na bamvula, ntwenya ya bakala, na yina yandi tubaka, “Mu ke mona Luzingu ya Kukonda nsuka, kana Mu ke kulumuka na bantu yayi ya mawa, yina ba me yambula, mpe kutambula na bawu, samu ti bawu kele bantu ya Nzambi. Mu fwana ve. Mu lenda vwanza ntinu, kasi mu zola ve kuvwanda ntinu. Mu lenda kuzwa mbongo nyonso yina kele na Égypte, samu ti mu ke vwanza mfumu ya yawu. Mu zola yawu ve. Mu ke zola mingi kutambula na Yesu.” Mpe kuna ntangu yandi lutaka na luzingu, mpe na yina ntangu yandi bandaka na kubasika na luzingu, ya vwandaka na Ntwadisi ya yandi samu na kusimba yandi na diboko.

¹³⁰ Beno zola ve Ntwadisi yina? Beto nionso zola ve ti Ntwadisi yina kusimba yandi na diboko ya Yandi?

¹³¹ Bankama ya bamvula na ntuala, ba monaka yandi na Ntwadisi ya yandi ya nene. Yandi twadisaka. Yandi salaka—yandi salaka nsodolo, ya buntwenya ya yandi, mpe na yawu Nzambi vwanza simba yandi.

¹³² Beno zaba yinki? Mvwama kele na difelo, ntwenya mosi ya bakala ya mvwama yina mangaka. Beno me mona, ntangu yayi beno bambuka moyo, yandi longukaka, yandi vwanza na nsambulu, yandi kwendaka na dibuundu, yandi vwanza muntu ya mbote, kasi yandi mangaka Yesu. Beno me mona?

¹³³ Mpe ntwenya ya bakala yayi, yandi longokaka, mpe yandi vwanza na nsambulu, kasi yandi zolaka Yesu. Beno me mona,

Moise zolaka vwanda muntu ya nene ya ngolo kulutila—kulutila bakala yayi ya ntwenia zolaka vwanda, samu yandi vwandaka kaka na mwa mbongo, kukondwa ntembe mpe bima ya mutindu yina, mpe mu banza politiki mpe nionso yina, kasi Moise zolaka vwanda ntinu na zulu ya ntoto. Mpe yandi bikaka nionso yina.

¹³⁴ Mpe beno zaba yinki, bana? Ntangu ya kele ve na Egypte, mpe ntangu ya kele ve na bimvwama, ya ke vwanda dyaka na Moise, samu ti yandi soolaka kima ya mbote. Beno me mona? Yandi soolaka kima ya mbote samu na kutwadisa yandi.

¹³⁵ Ntangu ya kele dyaka ve na ba-pyramide ya nene! Beno ke tanga yina me tala ba-pyramide na Egypte? Mosi ya bilumbu yayi, ba ke vwanda putulu, na yisi ya bombe atomique. Bimvwama nyonso ya yinza, bantu ke losa yawu na mupepe, mpe ke boka, mpe ke tuba ti ya me beba na nzutu ya bawu, mpe ke boka mpe ke dila. Beno me mona, ya ke luta.

¹³⁶ Kasi bayina ndimaka Yesu na kutwadisa bawu, bawu ke kufwa ata mbala mosi ve. Bawu kele na Luzingu ya Kukonda nsuka. Ata ti bawu ke kufwa landila yinza awa, Yesu ke vumbula bawu dyaka.

¹³⁷ Beno fwana sala nsodolo. Nsodolo ya beno ke baka yina kisika ya beno ya nsuka ya seko ke vwanda. Beno bambuka moyo, Yesu ke yufula mosi na mosi ya beto, “Landa Munu kana nge zola Luzingu.” Beno me mona, lutwadusu, “Landa Munu. Nge ke kuzwa Luzingu ya kukonda nsuka.” Mpe mu ke kwikila, ata mpe samu na beto bakuluntu, beto ke kuzwa kima mosi na yayi, mpe. Kana beno zola Luzingu, beno fwana ndima Yawu. Beno zola nsambulu, beno ndima yawu. Kana beno zola . . . Yina beno fwana sala, yina beno ke ndima, ya kele yina beno ke kuzwa. Kasi samu na munu mpe samu na beno, mpe bana yayi ya fioti, beno bambuka moyo, beno ke na lubokilu. Yesu tubaka, “Landa Munu, mpe kuzwa Luzingu ya Kukonda nsuka.” Ya kele yina beto zola kusala, mutindu yina ve?

¹³⁸ Ntangu yayi bantu yikwa na kati ya beno zola kieleka kulanda Yesu, mpe beno ke tuba, “Kubanda, kubanda, ntangu mu ke kumaka nene mingi mpe kiboba mingi samu na kusala nsodolo ya munu, mpe kusala yina . . . Mu ke kipe ve lutangu ya mbongo yina kele na munu, mutindu mu kele mputu, mutindu bantu ke sekaka munu, to nyonso yankaka, Mu zola kulanda Yesu. Mu zola sala nsodolo ya Moise, bakala ya mvwama ve”? Bantu yikwa zola kusala yawu kaka awa? Ntangu yayi kieleka beno zola kusala yawu?

¹³⁹ Mu zola ti beno telema na munu. Mu zola ti nge tula diboko ya nge na zulu ya ntima ya nge, mpe nge telemisa diboko ya nge ya kibakala. Mu zola ti beno kanga meso ya beno ntangu yayi mpe beno kulumusa yintu ya beno, mpe beno tuba kaka bampova yayi na manima ya munu:

¹⁴⁰ Yesu ya luzolo, mu ke sila luzingu ya munu na Nge. Mu me kuwa dilongi yayi kisika babakala zole ya bantwenia salaka nsodolo ya bawu. Mu zola ve kukwenda nzila ya ntwenya ya mfumu. Kasi mu zola kwenda nzila ya Moise. Mu kele kaka mwana, dyaka. Twadisa munu, Yesu ya luzolo, na Luzingu ya Kukonda nsuka. Amen.

Ntangu yayi beno kulumusa yintu ya beno.

¹⁴¹ Yesu ya luzolo, kilumbu mosi, na kizunga ya Nge awa na zulu ya ntoto, bawu nataka na Nge bana ya fyoti mutindu mu vwandaka zonza na manima ya midi yayi. Mpe bilandi tubaka, “Mulongi me lemba mingi. Yandi longaka na suka yayi. Yandi longaka, *yayi* mpe *yina*, mpe Yandi me lemba mingi. Ya ke mpasi Yandi ve.”

¹⁴² Kasi, Yesu, Nge tubaka, “Beno bika bana ya fyoti kukwiza na Munu, samu ti ya kele Kimfumu ya Mazulu.”

¹⁴³ Mfumu Nzambi, bubu yayi kuzwa bana-babakala yayi ya fioti mpe bana-bakento yayi awa, na lukolo yayi ya ludedomo, awa kisika mpangi ya beto ya bakala me kota na lweka ya ntoto ya kuyuma awa, samu na kubasisa mabuta yina ke na nsatu ya kukabuka bawu mosi na bima ya yinza, samu na kuzinga kaka samu na Nge. Mpe ntangu yayi bana ya bawu ya fyoti kele awa, ke na kotalaka mbote baluzingu ya tata ya bawu mpe mama ya bawu, mutindu beto—beto kele bambandu na nyonso yina beto ke sala. O Nzambi ya Luzolo, Kiyidiki ya Mazulu mpe ntoto, twadisa makulu ya beto, Mfumu, ti beto ke sala kima mosi ve na ntwala ya bana yayi ya fioti, yina ke tula ditadi ya disakuba na nzila ya bawu. Samu ba me tuba, ya ke vwanda mbote ti ba kanga ditadi ya nene na laka ya beto, mpe bawu losa beto na kati ya mubu, kana beto me niongisa mosi ya bana yayi ya fioti. Nge tubaka, “Bawanzio ya bawu ke talaka ntangu nionso kizizi ya Tata ya Munu yina kele na Mazulu,” wanzio ya nene, mpe Wanzio ya mukengi, na zulu ya mosi na mosi ya mwa myoyo yayi.

¹⁴⁴ Mutindu bawu vwandaka na manima ya midi yayi na mwa meso ya bawu ya kuzibuka, na kotalaka mpe vwandaka pesa mvutu na bakyuvu, mpe kuwa mwa masolo ya Biblia samu na bana ya fioti, mpe wapi mutindu bantwenya zole yayi salaka bansodolo ya bawu, mpe mosi na mosi ya bawu pesaka baluzingu ya bawu na Nge. O Yehowa Nzambi, twadisa bawu, keba bawu. Mpe bika bawu kuzwa Ntwadisi yayi ya nene, Yesu Klisto, yina ke twadisa bawu ntangu tata na mama mpe milongisi me manisa na bawu. Bika ti Nge twadisa bawu na Luzingu ya Kukonda nsuka, mutindu Nge salaka na Moise, mutindu bana ya bawu ya kukikulumusa, ya fioti, kisambu kwendaka na Nge. Mu ke pesa bawu na Nge, Mfumu, mutindu kisadi ya Nge, mutindu ba-trophée mpe misanga samu na yimpu ya Nge. Sadila bawu, Mfumu, samu na kuzitisa Nge, na zulu ya ntoto. Na Nkumbu ya Yesu Klisto. Amen.

145 Mpe beno bana ya fyoti, bantu, lenda . . . Ntangu yayi beno ke kuwa mbote na yawu ntangu yayi? Beno zaba ti Yesu ke twadisa beno mpe ke twadisa beno. Beno ke kwikila yawu ve? Mpe Yesu ke sala beno bana-babakala ya fioti kaka mutindu Moise na Miryam, profetese mpe—mpe profete, Yandi ke sala bantu ya nene na kati ya beno.

146 Ntangu yayi, beto bantu ya kukula, bayina ndimaka Yandi, beto zola ve ti Yandi twadisa beto, mpe? Mu zola ti Yandi twadisa munu, kutwadisa makulu ya munu, kusimba diboko ya munu. Beno me mona? Mpe ata mpe ntangu mu kumaka na nzadi, mu—mu zola simba diboko ya Yandi. Beto nionso zola yawu, mutindu yina ve?

147 Yesu ya luzolo, twadisa beto, mpe, Tata. Ntangu yayi beto ke na kukubamaka na kukabula mosi na yankaka. Mu fwana vutuka na Tucson. Mu fwana kubama samu na balukutakanu ke kwisa. Nzambi, mu me pesa kimvuka yayi ya bantu, Mpangi Leo mpe Mpangi Gene, mpe bayina nionso ke landaka awa, na maboko ya Nge, ti Nge ke sakumuna bawu mpe ke zola bawu, na kulemvokilaka masumu ya bawu nionso ya nkú, na kubeluka ya bimbevo ya bawu nionso, ke bumba bawu ntangu nyonso na zola mpe kubundana, mpe ke pesa kikesa na bayina ke kuzwa . . . ke lemba. Mpe ntangu yankaka Satana lendaka kwisa mpe kunata bawu na kulemba nzutu, kasi, beno bambuka moyo, Nge lutaka na kima mutindu mosi, kulemba, bika na—na bantu ya ntoto yayi, mpe bantu. Mpe bantangu yankaka bankundi ya kulutila ntalu, ata ti kimpangi, ba me yambula beto. Kasi ya kele na Mosi yina beto soolaka, Yandi ke bika beto ata fioti ve to ke yambula beto ve.


148 Twadisa beto, Mfumu, na Luzingu ya Kukonda nsuka. Mu ke sambila ti Nge ke pesa ti beto lenda vukana bambala mingi, na zulu ya ntoto, mpe kuzonzila na Nge mpe kuzonzila na Nge. Mpe kuna na Kilumbu yango ya nene, ntangu yinza me manisa mpe ntangu nyonso me kota na Seko, bika ti beto kutana na Kimfumu yina ya nene, mutindu mabuta yina ba me kabula ve, samu na kuzinga kintwadi na bilumbu na ntwala. Pesa yawu, Mfumu. Na kuvingilaka, beto fwana sala, kusala na ngolo ya beto nionso, na ntangu mwini ke na kusemaka. Samu beto me lombwa yawu na Nkumbu ya Yesu. Amen.

149 Nzambi sakumuna mosi na mosi ya beno. [Kisika ya mpamba na bande—Mu.]

Yandi simbisa beno, na nzila ya lutwadusu ya
ndongosolo ya Yandi,
Yandi simbisa beno na maboko ya Yandi ya
lukengolo;
Nzambi vwanda na beno tii beto ke kutana
dyaka!

Tii beto ke kutana! tii beto ke kutana!

Tii beto ke kutana na makulu ya Yesu;
Tii beto ke kutana! tii beto ke kutana!
(Matondo na nge, mpangi-bakala.)
Nzambi vwanda na beno tii beto ke kutana
dyaka!

Nzambi sakumuna beno nionso. 

65-1031A Lutwadusu
Kisika Pine Lawn Trailer Park
Prescott, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org